

遼

史

四

蘇子卿

本紀第二十二

遼史二十二

開府儀同三司上柱國錄軍國軍事忠義公相監修國史領經筵事都總裁臣脫脫奉

勅修

道宗二

八年春正月癸丑如鴨子河二月駐蹕納葛濼三月戊申朔楚王蕭革致仕進封鄭國王夏五月吾獨婉惕隱屯禿葛等乞歲貢馬駝許之六月丙子朔駐蹕拖古烈辛丑以右夷离畢奚馬六爲奚六部大王是月御清涼殿放進士王鼎等九十三人秋七月甲子射熊于外室刺冬十月甲戌朔駐蹕獨盧金十二月庚辰以知北院樞密使事蕭圖

古辭爲北院樞密使癸未幸西京戊子以皇太后行再生  
禮曲赦西京囚

九年春正月辛亥幸駕鰲灤辛未禁民鬻銅三月辛未宋  
主禎殂以姪暉爲子嗣位夏五月丙午以隋王仁先爲南  
院樞密使徙封許王是月清署曷里城秋七月丙辰如太  
子山戊午皇太叔重元與其子楚國王涅魯古及陳國王  
陳六同知北院樞密使事蕭胡覲衛王貼不林牙涅刺溥  
古統軍使蕭迭里得駙馬都尉參及弟朮耆圖骨旗鼓拽  
刺詳穩耶律郭九文班太保奚叔內藏提點烏骨護衛左  
太保敵不古按荅副宮使韓家奴寶神奴等凡四百人誘

脅弩手軍犯行宮時南院樞密使許王仁先知北樞密院  
事趙王耶律乙辛南府宰相蕭唐古北院宣徽使蕭韓家  
奴北院樞密副使蕭惟信敦睦宮使耶律良等率宿衛士  
卒數千人禦之涅魯古躍馬突出將戰爲近侍詳穩渤海  
阿厮護衛蘇射殺之己未族逆黨家庚申重元亡入大漠  
自殺辛酉詔諭諸道壬戌以仁先爲北院樞密使進封宋  
王加尚父耶律乙辛南院樞密使韓家奴殿前都點檢封  
荆王蕭惟信耶律馮家奴並加太子太傅宿衛官蕭乙辛  
回鶻海隣裏里耶律撻不也阿厮宮分人急里哥霞抹乙  
辛只魯並加上將軍諸護衛及士卒庖夫弩手傘子等三

百餘人各授官有差耶律良密告重元變命籍橫帳裏萬董房爲漢人行宮都部署癸亥貼不訴爲重元等所脅詔削爵爲民流鎮州戊辰以黑白羊祭天八月庚午朔遣使安撫南京吏民癸酉以永興宮使耶律塔不也有定亂功爲同知點檢司事冬十月戊辰朔幸興王寺庚午以六院部太保耶律合术知南院大王事是月駐蹕藕絲淀十一月辛丑以南院宣徽使蕭九哥爲北府宰相己未追封故富春郡王耶律義先爲許王是歲封皇子濬爲梁王

十年春正月己亥北幸二月禁南京民決水種粳稻秋七月壬申詔決諸路囚辛巳禁僧尼和諧行在妄述禍福取

財物九月壬寅幸懷州謁太宗穆宗廟冬十月壬辰朔駐蹕中京戊午禁民私刊印文字十一月甲子定吏民衣服之制辛未禁六齋日屠殺丁丑詔求乾文閣所闕經籍命儒臣校讎庚辰以彰國軍節度使韓謝十爲惕隱詔南京不得私造御用綵段私貨鐵及非時飲酒命南京三司每歲春秋以官錢饗將士十二月癸巳以北院大王蕭元古匿爲契丹行宮都部署是歲南京西京大熟

咸雍元年春正月辛酉朔文武百僚加上尊號曰聖文神武全功大略廣智聰仁睿孝天祐皇帝改元大赦冊梁王濬爲皇太子内外官賜綬有差甲子如魚兒濬庚寅詔諸

遇正旦重午冬至別表賀東宮三月丁亥以知興中府事  
楊績知樞密院事夏四月辛卯以知樞密院事張嗣復疾  
改知興中府事庚子清暑拖古烈五月辛巳夏國遣使來  
貢秋七月丙子以皇太后射獲熊賞賚百官有差八月丙  
申客皇犯天廟詔諸路備盜賊嚴火禁九月乙亥駐蹕藕  
絲淀丁丑左夷離畢慥古爲孟父敞隱冬十月丁亥朔辛  
暨巫閭山己亥皇太后射獲虎大宴群臣令各賦詩十一  
月壬戌有星如斗逆行隱隱有聲十二月甲午以遼王仁  
先爲南京留守徙封晉王辛亥以南京留守蕭惟信爲左  
夷離畢壬子熒惑與月並行自旦至午

二年春正月丁巳如鴨子河宋賀正使王嚴卒以禮送還  
癸未幸山榆淀二月甲午詔武定軍節度使姚景行問以  
治道拜南院樞密使三月辛巳以東北路詳穩耶律韓福  
奴爲北院大王壬午彗星見於西方夏四月霖雨五月乙  
亥駐蹕拖古烈辛巳以戶部使劉詵爲樞密副使六月丙  
戌回鶻來貢甲辰阻卜來貢秋七月癸丑朔以西北路招  
討使蕭朮者爲北府宰相左夷離畢蕭惟信南院樞密使  
同知南院樞密使事耶律白惕隱丙辰南院樞密使姚景  
行致仕庚申錄囚辛酉景行復前職丁卯如藕絲淀以歲  
旱遣使振山後貧民九月壬子朔日有食之以參知政事



韓孚爲樞密副使冬十二月壬午以知樞密院事楊績爲南院樞密使樞密副使劉詵參知政事戊子僧守志加守司徒丁酉以西京留守合朮爲南院大王辛丑以蕭朮者爲武定軍節度使是年御永安殿放進士張臻等百一人二年春正月辛亥如鴨子河甲子御安流殿釣魚三月癸亥宋主曙殂子頊嗣位遣使告哀即遣右護衛太保蕭撻不也翰林學士陳覺等弔祭閏月丁亥扈駕軍營火賜錢粟及馬有差辛卯駐蹕春州北浞乙巳以蕭兀古匿爲北府宰相夏五月壬辰駐蹕納葛灤壬寅賜隨駕官諸工人馬六月戊申有司奏新城縣民楊從謀反僞署官吏上曰

小人無知此兒戲爾獨流其首惡餘釋之庚戌宋遣使饋  
其先帝遺物辛亥宋以即位遣陳襄來報即遣知黃龍  
府事蕭圖古辭中書舍人馬鉉往賀壬戌南府宰相韓王蕭  
唐古致仕壬申以廣德軍節度使耶律藥奴爲南府宰相  
度支使趙徽參知政事秋七月辛丑焚惑書見九二十五  
日九月戊戌詔給諸路囚糧癸卯幸南京冬十一月壬辰  
夏國遣使進回鶻僧金佛林九覽經十二月丁未以參知  
政事劉詵爲樞密副使東北路詳穩高南院大王樞密直  
學士張孝傑參知政事己酉以張孝傑同知樞密院事丁  
巳行再生禮赦死罪以下是月夏國王李諒祚薨是歲南

京旱蝗

四年春正月甲戌朔日有食之丙子如鴛鴦澤辛巳改易  
州兵馬使爲安撫使丁亥獵炭山辛卯遣使振西京饑民  
二月甲辰朔詔元帥府募軍壬子夏國王李諒祚子秉常  
遣使告哀癸丑頒行御製華嚴經贊丁卯北行三月丙子  
遣使夏國弔祭甲申振應州饑民乙酉詔南京除軍行地  
餘皆得種稻庚寅振朔州饑民乙未夏國王秉常遣使獻  
其父諒祚遺物夏四月戊午阿薩蘭回鶻遣使來貢五月  
丙戌駐蹕拖古烈六月壬子西北路兩穀方三十里丙寅  
以北院林牙耶律趙三爲北院大王右夷離畢蕭素峒中

京留守秋七月壬申置烏古敵烈部都統軍司丙子獵黑  
嶺是月南京霖兩地震九月己亥駐蹕藕絲淀冬十月辛  
亥曲赦南京徒罪以下囚永清武清安次固安新城歸義  
容城諸縣水復一歲租戊辰冊李秉常爲夏國王十二月  
辛亥夏國遣使來貢

五年春三月阻卜叛以晉王仁先爲西北路招討使領禁  
軍討之夏六月己亥駐蹕拖古烈丙午吐蕃遣使來貢壬  
戌以南院樞密使蕭惟信知北院樞密使事秋七月乙丑  
朔日有食之戊辰夏國遣使來謝封冊祭未訖蔡亨旂恃  
勢侵漁細民八月謁慶陵九月戊辰仁先遣人奏阻卜捷

冬十月己亥駐蹕藕絲淀十一月丁卯詔四方館副使止以契丹人充丁丑五國部阿里部叛命蕭素颯討之閏戊申夏國王李秉常遣使乞賜印綬己未僧志福加守司徒十二月甲子行皇太子再生禮減諸路徒以下罪一等乙丑詔百官廷議國政甲戌五國來降仍獻方物

六年春正月甲午如千鵝灤二月丙寅阻卜來朝貢方物夏四月癸未西北路招討司以所降阻卜酋長至行在五  
月甲辰清暑拖古烈甲寅設賢良科詔應是科者先所  
業十萬言進六月辛巳阻卜來朝乙酉以惕隱耶律白爲  
中京留守是月御永安殿放進士趙廷睦等百三十八人

秋七月辛亥獵于合魯鼉特八月丙子耶律白鼉追封遼  
西郡王九月庚戌幸藕絲淀甲寅以馬希白詩才敏妙十  
吏書不能給召試之冬十月丁卯五國部長來朝壬申西  
北路招討司擒阻卜酋長來獻十一月乙卯禁鬻生熟鐵  
于回鶻阻卜等界十二月戊午加圓釋法鈞二僧並守司  
空已未以坤寧郎赦死罪以下辛酉禁漢人捕獵

七年春正月戊子如鴨子河二月乙丑女直進馬丙寅以  
南院樞密使姚景行知興中府事三月己酉以討五國功  
加知黃龍府事蒲延懷化軍節度使高元紀易州觀察使  
高正並千牛衛上將軍五國節度使蕭陶蘇幹寧江州防

通鑑卷一百一十一  
御使大榮並靜江軍節度使韋黑水夏四月癸酉如納葛  
灤乙亥禁布帛短狹不中尺度者六月己卯吐蕃來貢  
未南院大王高八致仕秋七月甲申朔以東北路詳穩合  
里只爲南院大王西南面招討使拾得奴爲奚六部大王  
己丑遣使按問五京囚庚子如藕絲淀八月辛巳置佛骨  
于招仙浮圖罷獵禁屠殺冬十月己卯如盤巫間山壬戌  
以南府宰相耶律藥奴爲南京統軍使戊辰謁乾陵庚辰  
詔百官廷議軍國事十一月戊子免南京流民租己丑振  
饒州饑民丙午高麗遣使來貢十二月壬子以契丹行宮  
都部署耶律胡覲知北院樞密使事知北院樞密使事蕭

惟信爲南府宰相兼契丹行宮都部署丁巳漢人行宮都  
部署李仲禧北院宣徽使劉霖樞密副使王觀都承旨揚  
興工各賜國姓戊寅回鶻來貢是歲春州斗粟六錢

本紀第二十二



通鑑

卷

七

本紀第二十三

遼史二十三

開府儀同三司上柱國錄軍國重事中書右丞相監修國史領經筵事都總裁臣 脫脫奉

勅修

道宗三

八年春正月癸未烏古敵烈部詳穩耶律巢等奏覓北邊  
捷以戰多殺人飯僧南京中京甲申如魚兒濼壬寅昏霧  
連日二月丙辰北南樞密院言無事可陳壬戌以討北部  
功烏古敵烈部詳穩耶律巢知北院大王事都監蕭阿魯  
帶烏古敵烈部詳穩加左監門衛上將軍戊辰歲饑免武  
安州租稅振恩蔚順惠等州民三月癸卯有司奏春泰寧

江三州三千餘人願爲僧尼受具足戒許之夏四月季  
振義饒二州民丁巳駐蹕塔里捨巳卯清暑拖古烈五月  
壬午晉王仁先薨六月甲寅振易州貧民巳未振中京甲  
子振中興府甲戌封北府宰相楊績爲趙王樞密副使耶  
律觀參知政事兼知南院樞密使事丁丑高麗遣使來貢  
秋七月巳郊慶州斬文高八丑同居詔賜爵丙申振饒州  
饑民丁酉幸黑嶺丁未以御書畢嚴經五頌出示群臣閏  
月辛未射熊于殺羊山八月庚辰混同郡王侯古薨遣使  
致祭九月甲子駐蹕藕絲淀冬十月巳丑參知政事耶律  
觀矯制營私第降爲庶人癸巳回鶻來貢十一月庚戌免

祖州稅丙辰大雪許民糴採禁地丁卯賜延昌宮資在錢  
十二月戊辰漢人行宮都部署耶律仲禧封韓國公樞密  
副使參知政事趙徽出爲武定軍節度使樞密副使柴德  
滋參知政事漢人行宮副部署耶律大悲奴陞都部署同  
知南院樞密使事蕭韓家奴知左夷離畢事丁丑以坤寧  
節大赦庚寅賜高麗佛經一藏

九年春正月丁未如雙灤夏四月壬辰如旺國崖秋七月  
甲辰獵大熊山戊申烏古敵烈統軍言八石烈敵烈人殺  
其節度使以叛己酉詔隗烏古部軍分道擊之丙寅南京  
奏歸義涑水兩縣蝗飛入宋境餘爲蜂所食八月丙申以

耶律仲禧爲南院樞密使九月癸卯駐蹕獨盧金冬十月幸陰山遂如西京十一月戊午詔行幸之地免租一年甲子南院大王合理只致仕十二月辛未已知北院樞密使事耶律宜新爲中京留守南院宣徽使耶律撒剌爲南院大王壬辰高麗夏國並遣使來貢

十年春正月乙卯如鴛鴦濼二月癸未蠲平州復業民租賦戊子阻卜來貢三月甲子如拖古烈以耶律巢爲北院大王夏四月旱辛未以奚人達魯三世同居賜官旌之五月丙寅錄囚六月戊辰親出題試進士壬申詔臣庶言得失丙子御永安殿策賢良秋七月丙辰如秋山癸亥謁慶

陵九月庚戌幸東京謁二儀五鳳殿癸亥祠木葉山冬十月丁卯駐蹕藕絲淀丁丑詔有司頒行史記漢書十一月戊午高麗遣使來貢十二月辛巳改明年爲大康大赦大康元年春正月乙未如混同江壬寅振雲南饑二月丁卯祥州火遣使恤災乙酉駐蹕大魚濼丁亥以獲獐加鷹坊使耶律楊六爲工部尚書三月乙巳命皇太子寫佛書夏四月丙子振平州饑乙酉如犢山閏月丙午振平濼二州饑庚戌皇孫延禧生五月甲子賜妃之親及東宮僚屬爵有差六月癸巳以興聖宮使奚謝家奴知奚六部大王事戊戌知三司使事韓操以錢穀增羨授三司使癸卯遣

使按問諸路因以惕隱大悲奴爲始平軍節度使參知政  
事柴德滋武定軍節度使乙卯吐蕃來貢丙辰詔皇太子  
總領朝政仍戒諭之以武定軍節度使趙徽爲南府宰相  
樞密副使楊遵勗參知政事秋七月辛酉朔獵平地松林  
丙寅振南京貧民八月庚寅朔日有食之九月乙亥駐蹕  
藕絲淀已卯以南京饑免租稅一年仍出錢粟振之冬十  
月西北路酋長遐搭雞搭雙古等來降十一月辛酉皇后  
被誣賜死殺伶人趙惟一高長命並藉其家屬十二月己  
丑以南京統軍使耶律藥奴爲惕隱漢人行宮都部署耶  
律霖樞密副使同知東京留守事蕭鐸剌史萬里庚寅賜

張孝傑國姓壬辰以西京留守蕭燕六爲左夷離畢

二年春正月己未如春水庚辰駐蹕雙灤二月戊子振黃  
龍府饑癸丑南京路饑免稅租一年三月辛酉皇太后崩  
壬戌遣殿前副點檢耶律轄古報哀于宋癸亥遣使報哀  
于高麗夏國丁卯大赦戊寅以皇太后遺物遣使遺宋夏  
六月乙酉朔上太行皇太后尊謚曰仁懿皇后戊子宋及  
高麗夏國各遣使弔祭甲午葬仁懿皇后于慶陵己亥駐  
蹕拖古烈壬寅出北院樞密使魏王耶律乙辛爲中京留  
守丁未冊皇后蕭氏封其父祗候郎君鼉里刺爲趙王叔  
西北路招討使余里也遼西部王漢人行宮都部署駙馬



都尉霞抹柳城郡王參知政事楊遵勛知南院樞密使事  
北院樞密副使蕭速撒知北院樞密使事漢人行宮副部  
署劉訖參知政事己酉南府宰相趙徽致仕秋七月戊辰  
如秋山癸酉柳城郡王霞抹薨八月庚寅獵遇麋失其母  
憫之不射九月戊午以南京蝗免明年租稅己卯駐蹕藕  
絲淀冬十月戊戌召中京留守魏王耶律乙辛復爲北院  
樞密使十一月甲戌上欲觀起居注修注郎不攝及忽突  
董等不進各杖二百罷之流林牙蕭岩壽於烏隗部是月  
南京地震民舍多壞十二月己丑以左夷萬畢蕭撻不也  
爲南京統軍使

三年春正月癸丑如混同江乙卯省諸道春貢金帛及傳  
周歲所輸尚方銀二月壬午朔東北路統軍使蕭韓家奴  
加尚父封吳王甲申詔北院樞密使魏王耶律乙辛同母  
兄大奴同母弟阿思世預北南院樞密之選其異母諸弟  
世預夷離董之選己丑如魚兒灤辛卯中京饑罷巡幸夏  
四月乙酉泛舟黑龍江五月丙辰玉田安次蜾傷稼癸亥  
日中有黑子己巳駐蹕積山乙亥北院樞密使耶律乙辛  
奏右護衛太保查剌等告北院樞密使蕭速撒等八人謀  
立皇太子上以無狀不治出速撒等三人補外護衛撒撥  
等六人各鞭百餘徙于邊丙子以西北路招討使遼西郡

王蕭余里也爲北府宰相兼知契丹行宮都部署事戊寅  
詔告謀逆事者重加官賞六月己卯朔耶律乙辛令牌印  
郎君蕭訛都幹誣首賞預速撒等謀籍其姓名以告郎命  
乙辛及耶律仲禧蕭余里也耶律孝傑楊遵勗燕哥抄只  
蕭十三等鞫治杖皇太子囚之宮中辛巳殺宿直官敵里  
刺等三人壬午殺宣徽使撻不也等二人癸未殺始平軍  
節度使撒刺等十人又遣使殺上京留守速撒及已徙護  
衛撒撥等六人乙酉殺耶律撻不也及其弟陳留丙戌廢  
皇太子爲庶人囚之上京己丑回鶻來貢殺東京留守同  
知耶律回里不辛卯殺速撒等諸子籍其家戊申遣使接

五京諸道獄秋七月辛亥護衛太保查次加鎮國大將軍  
預突呂不部節度使之選室韋查刺及蕭寶神奴謀魯古  
並加左衛大將軍牌印郎君訛都幹尚皇女趙國公主授  
駙馬都尉始平軍節度使祗候郎君耶律撻不也及蕭圖  
古辭並加監門衛上將軍壬子知北院樞密副使蕭韓家  
奴爲漢人行宮都部署乙丑如秋山丁丑謁慶陵八月庚  
寅漢人行宮都部署蕭韓家奴薨辛丑謁慶陵九月癸亥  
玉田貢嘉禾壬申修乾陵廟冬十月辛丑駐蹕藕絲淀十  
一月北院樞密使耶律乙辛遣其私人盜殺庶人濬于上  
京閏十二月戊午以北府宰相遼西郡王蕭余里也知北

院樞密使事左夷離畢耶律燕哥爲契丹行宮都部署丙寅預行正旦禮是歲南京大熟

四年春正月庚辰如春水甲午振東京饑二月乙丑駐蹕掃獲野戍辰以東路統軍使耶律王九爲惕隱夏四月辛亥高麗遣使乞賜鴨綠江以東地不許五月丙戌駐蹕散水原六月甲寅阻卜諸酋長進良馬秋七月甲戌諸路奏飯僧尼三十六萬八月癸卯詔有司決滯獄九月乙未駐蹕蹕藕絲淀庚子五國部長來貢冬十月癸卯以參知政事劉伸爲保靜軍節度使十一月丁亥禁士庶服用錦綺日月山龍之文己丑回鶻遣使來貢庚寅南院樞密使耶律

仲禧爲廣德軍節度使辛卯錦州民張寶四世同居命諸  
子三班院祗候十二月丁卯以北院樞密副使耶律霖知北  
院樞密使事

本紀第二十三



本紀第二十四

遼史二十四

開府儀同三司上柱國錄軍國事上書省丞相兼修國史領經筵事都總裁臣脫脫奉

勅修

道宗四

五年春正月壬申如混同江癸酉賜宰相耶律孝傑名仁  
傑乙亥如山榆淀三月辛未以宰相仁傑獲頭鵝加侍中  
壬辰以北院樞密使魏王耶律乙辛知南院大王事加于  
越知北院樞密使事耶律霖爲北院樞密使北院樞密副  
使耶律特里底知北院樞密使事左夷离畢耶律世遷同  
知北院樞密使事夏四月己未如納葛濼五月丁亥謁慶



陵以契丹行宮都部署耶律燕哥爲南府宰相北面林牙  
耶律永寧爲夷離畢同知南院樞密使事蕭撻不也及殿  
前副點檢駙馬都尉蕭酬幹並封蘭陵郡王六月辛亥阻  
卜來貢丁巳以北府宰相遼西郡王蕭余里也爲西北路  
招討使己未遣使錄囚是月放進士劉瓘等百一十三人  
秋七月己卯獵夾山八月庚申命有司撰太宗神功碑立  
于南京九月己卯詔諸路毋禁僧徒開壇壬午禁虜從擾  
民冬十月戊戌夏國遣使來貢己亥駐蹕獨盧金壬子詔  
惟皇子仍一字王餘並削降丁巳振平州貧民己未以趙  
王楊績爲遼西郡王魏王耶律乙辛降封混同郡王吳王

蕭韓家奴蘭陵郡王致仕十一月丁丑召沙門守道開壇  
于內殿癸未復南京流民差役三年被火之家免租稅一  
年十二月丙午彗星犯尾乙卯幸西京戊午行再生禮赦  
雜犯死罪以下

六年春正月癸酉如鴛鴦澤辛卯耶律乙辛出知興中府  
事三月庚寅封皇孫延禧爲梁王忠順軍節度使耶律頗  
德南院大王耶律仲禧南院樞密使戶部使陳毅參知政  
事夏四月乙卯獵炭山五月壬申免平州復業民租賦一  
年庚寅以旱禱雨命左右以水相沃俄而雨降六月戊戌  
駐蹕納葛灤戊申以度支使王績參知政事庚戌女直遣

使來貢秋七月戊辰觀市癸未爲皇孫梁王延禧設旗鼓  
拽刺六人衛護之甲申獵沙嶺九月壬寅祠木葉山己酉  
駐蹕藕絲淀冬十月己未朔省同知廣德軍節度使事命  
奉先軍節度使兼巡警乾顯二州丁卯耶律仁傑出爲武  
定軍節度使庚午參知政事劉詵致仕癸酉以陳毅爲漢  
人行宮都部署王績同知樞密院事辛巳回鶻遣使來貢  
十一月己丑朔日有食之癸卯召群臣議政十二月甲子  
以耶律特里底爲孟父敞穩乙丑以蕭撻不也爲北府宰  
相耶律世遷知北院樞密使事耶律慎思同知北院樞密  
使事庚午免西京流民租賦一年甲戌減民賦丁亥豫行

正旦禮戊子如混同江

七年春正月戊申五國部長來貢甲寅女直貢良馬二月

甲子如魚兒灤夏五月壬子駐蹕嶺西癸丑有司奏水清

武清固安三縣蝗甲寅以蕭撻不也兼殿前都點檢蕭酬

幹爲漢人行宮都部署兼知樞密院事六月甲子詔月祭

觀德殿歲寒食諸帝在時生辰及忌日詣景宗御容殿致

奠丙寅阻卜余古赧來貢丁卯以翰林學士王言敷參知

政事封北院宣徽使石篤漆水郡王秋七月戊子如秋山

丙申謁慶陵八月丁卯射鹿赤山加圍場使涅葛爲靜江

軍節度使九月戊子次懷州命皇后謁懷陵辛卯次祖州

遼紀二十四  
命皇后謁祖陵乙巳駐蹕藕絲淀冬十月戊辰以惕隱主  
九爲南院大王夷离畢奚抄只爲彰國軍節度使十一月  
乙酉詔歲出官錢振諸宮分及邊戍貧戶丁亥幸駙馬都  
尉蕭酬幹第方飲宰相梁穎諫曰天子不可飲人臣家上  
即還宮己亥高麗遣使來貢辛亥除綃帛尺度狹短之令  
十二月丁卯武定軍節度使耶律仁傑以罪削爵爲民辛  
未知興中府事耶律乙辛以罪囚于萊州

八年春正月甲申如混同江丁酉鐵驪五國諸長各貢方  
物二月戊午如山榆淀辛酉詔北南院官凡給驛者必先  
奏聞貢新及奏獄訟方許馳驛餘並禁之己巳夏國獲宋

將張天一遣使來獻壬申以耶律頗德爲南府宰相兼知  
北院樞密使燕哥爲惕隱蕭撻不也兼知契丹行宮都部  
署事三月庚戌黃龍府女直部長朮乃率部民內附予官  
賜印綬是月詔行柅黍所定升斗夏四月壬戌以耶律世  
遷爲上京留守六月辛亥朔駐蹕納葛灤丙辰夏國遣使  
來貢丁巳以耶律頗德爲北院樞密使耶律巢哥南府宰  
相劉筠南院樞密使蕭撻不也兼知北院樞密使事王績  
漢人行宮都部署蕭酬幹國舅詳穩乙丑阻卜長來貢丙  
子以耶律慎思知右夷离畢事秋七月甲午如秋山南京  
霖雨沙河溢水清歸義新城安次武清香河六縣傷稼九

月庚寅謁慶陵丁未駐蹕藕絲淀大風雪平馬多死賜扈從官以下衣馬有差冬十月乙卯詔化哥傳導梁王延禧加金吾衛大將軍丙子謁乾陵十一月壬午以乙室大王蕭何葛爲南院宣徽使權知奚六部大王事圖赴爲本部大王十二月癸丑烏古敵烈統軍使耶律馬五爲北院大王庚申降皇后爲惠妃出居乾陵

九年春正月辛巳如春水夏四月丙午朔大雪平地丈餘馬死者十六七五月如黑嶺六月己未駐蹕散水原甲子以耶律阿思爲契丹行宮都部署耶律慎思北院樞密副使庚午詔諸路檢括脫戶罪至死者原之閏月丁丑以漢

人行宮副副署哥汗奴爲南院大王戊寅追謚庶人濟爲  
昭懷太子丁亥阻卜來貢己丑以知興中府事邢熙年爲  
漢人行宮都部署漢人行宮都部署王績爲南院樞密副  
使秋七月乙巳獵馬尾山丁巳謁慶陵癸亥禁外官部內  
貸錢取息及使者館于民家八月高麗王徽薨九月癸卯  
朔日有食之巳酉射熊于白石山加圍場使涅葛左金吾  
衛大將軍己巳以高麗王徽子三韓國公勲權知國事辛  
未五國部長來貢壬申召北南樞密院官議政事冬十月  
丁丑謁觀德殿己卯南院樞密使劉筠薨壬辰混同郡王  
耶律乙辛謀亡入宋伏誅十一月丙午進封梁王延禧爲



燕國王大赦以南院宣徽使蕭何葛爲南府宰相三司使  
王經參知政事兼知樞密事申寅詔僧善知讎校高麗所  
進佛經頒行之已未定諸令史譯史遷叙等級十二月丁  
亥以邢熙年知南院樞密使事辛卯以王言敷爲漢人行  
官都部署高麗三韓國公王勳薨是年御前放進士李君  
裕等五十一人

十年春正月辛丑朔如春水丙午復建南京奉福寺浮圖  
戊辰如山揄淀二月庚午朔萌古國遣使來聘三月戊申  
遠萌古國遣使來聘丁巳命知制誥王師儒牌印郎君耶  
律固傳導燕國王延禧夏四月丁丑女直貢良馬五月壬

戊駐蹕散水原乙丑阻卜來貢丙寅降國舅詳穩班位在  
敞穩之下六月壬辰禁毀銅錢爲器秋七月甲辰如黑嶺  
九月癸亥駐蹕藕絲淀冬十二月乙未改慶州大安軍曰  
興平是月改明年爲大安赦雜犯死罪以下

大安元年春正月丁酉如混同江癸卯王績知南院樞密  
使事邢熙年爲中京留守戊申以樞密直學士杜公疑參  
知政事庚戌五國酋長來貢良馬二月辛未如山榆浹夏  
四月乙酉宋主項殂子昀嗣位使來告哀辛卯西幸六月  
戊辰駐蹕拖古烈壬申以王績爲南府宰相蕭撻不也兼  
知南院樞密使事丁丑遣使弔祭于宋戊寅宋遣王真甄

祐等饋其先帝遺物秋七月乙巳遣使賀宋主即位戊午  
獵于赤山八月丁卯幸慶州戊辰謁慶陵冬十月癸亥駐  
蹕好草淀戊辰夏國主李秉常遣使報其母梁氏哀甲申  
以蕭撻不也爲南院樞密使十一月乙未詔比者外官因  
譽進秩久而不調民被其害今後皆以資給遷轉丁酉以  
南女直詳穩蕭袍里爲北府宰相辛亥史臣進太祖以下  
七帝實錄丙辰遣使冊三韓國公王勲子運爲高麗國王  
己未詔僧尼無故不得赴闕十二月甲戌宋遣蔡卞來謝  
弔祭

二年春正月辛卯如混同江己酉五國諸部長來貢癸丑

召權翰林學士趙孝嚴知制誥王師儒等講五經大義二月癸酉駐蹕山榆浚是月太白犯歲星三月乙酉女直貢良馬夏四月戊戌北幸癸丑遣使加統軍使蕭訛都幹太子太保裨將老古金吾衛大將軍蕭雅哥靜江軍節度使耶律燕奴右監門衛大將軍仍賜賚諸軍士五月丁巳朔以牧馬蕃息多至百萬賞群牧官以次進階乙亥駐蹕納葛灤戊寅宰相梁穎出知興中府事是月放進士張穀等二十六人六月丁亥朔以左夷离畢耶律坦爲惕隱知樞密院事耶律幹特剌兼知左夷离畢事丙申阻卜來朝癸卯遣使按諸路獄甲辰以同知南京留守事耶律那也知

右夷离畢事乙巳阻卜酋長余古赧及愛的來朝詔燕國  
王延禧相結爲友戊申以契丹行宮都部署耶律阿思兼  
知北院大五事壬子高墩以下縣令錄事兄弟及子悉許  
叙用秋七月丁巳惠妃母燕國夫人削去以厭魅梁王事  
覺伏誅子蘭陵郡王蕭酬幹除名置邊郡仍隸興聖宮戊  
午獵沙嶺甲子賜興聖積慶二宮貧民錢乙酉出粟振遼  
州貧民八月戊子以雪罷獵九月庚午還上京壬申發粟  
振上京中京貧民丙子謁二儀五鸞三殿己卯出太祖太  
宗所御鎧仗示燕國王延禧諭以創業征伐之難辛巳召  
南府宰相議國政冬十月乙酉朔以樞密副使竇景庸知

樞密院事丙戌五國部長來貢丁亥以夏國王李秉常薨遣使詔其子乾順知國事十一月甲戌爲燕國王延禧行再生禮曲赦上京囚戌寅高麗遣使謝封冊癸未出粟振乾顯成懿四州貧民十二月辛卯以蘭陵郡王蕭撻不也爲南院樞密使己亥夏國王李乾順遣使上其父遺物

本紀第二十四



本紀第二十五

遼史二十五

開府儀同三司柱國錄軍國事書丞相兼樞密使領經筵事都總裁臣脫脫奉

勅修

道宗五

三年春正月乙卯如魚兒濼甲戌出錢粟振南京貧民仍  
復其租賦已卯大雪三月丙戌發粟振中京饑甲辰以民  
多流散除安泊逃戶徵償法三月乙卯高麗遣使來貢已  
未免錦州貧民租一年甲戌免上京貧民租如錦州庚辰  
女直貢良馬夏四月戊子賜中京貧民帛及免諸路貢輸  
之半丙申賜隈烏古部貧民帛庚子如涼陁甲辰南府宰



通鑑卷一百一十五  
相王績薨乙巳詔出戶部司粟振諸路流民及義州之饑  
五月庚申海雲寺進濟民錢千萬秋七月丙辰獵黑嶺丁  
巳出雜帛賜興聖宮貧民庚午大雨罷獵丁丑秦越國王  
阿璉薨九月乙亥駐蹕匣魯金冬十月庚辰以參知政事  
王經爲三司使壬辰罷節度使已下官進珍玩癸卯追封  
秦越國王阿璉爲秦魏國王十一月甲寅以惕隱耶律坦  
同知南京留守事遼興軍節度使耶律王九爲南府宰相  
十二月己卯朔以樞密直學士呂嗣立參知政事

四年春正月庚戌如混同江甲寅太白晝見甲子五國部  
長來貢庚午免上京逋逃及貧戶稅賦甲戌以上京南京

饑許良人自鬻丁丑曲赦西京役徒二月己丑如魚兒灤

甲午曲赦春州役徒終身者皆五歲免己亥如春州赦泰

州役徒三月乙丑免高麗歲貢己巳振上京及平錦來三

州饑夏四月己卯振蘇吉復淶鐵五州貧民并免其租稅

甲申振慶州貧民乙酉減諸路常貢服御物丁酉立入粟

補官法癸卯西幸召樞密直學士耶律儼講尚書洪範五

月辛亥命燕國王延禧寫尚書五子之歌乙卯振祖州貧

民丁巳詔免役徒終身者五歲免之己未振春州貧民丙

寅禁挾私引水犯田六月庚辰駐蹕散水原丁亥命燕國

王延禧知中丞司事以同知南院樞密使事耶律鼎里知

右夷離畢知右夷離畢事耶律那也同知南院樞密使事  
庚寅北院樞密使耶律頗德致仕秋七月戊申曲赦奉聖  
州役徒丙辰遣使冊李乾順爲夏國王庚申如秋山己巳  
禁錢出境八月庚辰有司奏宛平永清蝗爲飛鳥所食庚  
寅謁慶陵冬十月丁丑獵遼水之濱己卯駐蹕藕絲淀癸  
未免百姓所貸官粟己丑知北院樞密使事耶律阿思封  
漆水郡王癸巳以乙室大王耶律敵烈知西北路招討使  
事權知西北路招討使事蕭朽哥知乙室大王事壬寅詔  
諸部長官親鞠獄訟十一月庚申興中府民張化法以父  
兄犯盜當死請代皆免十二月戊寅南府宰相耶律王九

致仕癸未以孟父敞穩耶律慎思爲中京留守閏十二月  
癸卯朔預行正旦禮丙午如混同江

五年春正月癸未如魚兒濼甲午高麗遣使來貢三月癸  
酉詔析津大定二府精選舉人以聞仍詔諭學者常窮經  
明道夏四月甲辰以知奚六部大王事涅葛爲本部大王  
壬子獵北山甲子霖雨罷獵五月丁亥駐蹕赤勒嶺己丑  
以阻卜磨古斯爲諸部長癸巳回鶻遣使貢良馬己亥以  
同知南院樞密使事耶律那也知右夷離畢事左祗候郎  
君<sup>班</sup>言穩耶律涅里知北院大王事六月甲寅夏國遣使  
來謝封冊壬戌以參知政事主言敷爲樞密副使前樞密

通鑑卷三十三  
副使賈士勲叅知政事兼同知樞密院事秋七月庚午獵  
沙嶺九月辛卯遣使遺宋鹿脯壬辰駐蹕藕絲淀冬十月  
乙巳以新定法令太煩復行舊法庚申以遼興軍節度使  
何葛爲乙室大王十一月丁卯朔燕國王延禧生子大赦  
妃之族屬進爵有差

六年春正月如混同江二月辛丑駐蹕雙山三月辛未女  
直遣使來貢夏四月丁酉東北路統軍司設掌法官庚子  
以同知南院樞密使事耶律吐朶知左夷離畢事五月壬  
辰駐蹕散水原六月甲寅遣使決五京囚秋七月丙子如  
黑嶺冬十月丁酉駐蹕藕絲淀十一月壬戌高麗遣使來

貢已巳以南府宰相竇景庸爲武定軍節度使是年放進士文充等七十二人

七年春正月壬戌如混同江二月己亥駐蹕魚兒灤壬寅詔給渭州貧民耕牛布絹三月丙戌駐蹕黑龍江夏四月丙辰以漢人行宮副部署耶律谷欲知乙室大王事五月己未朔日有食之六月甲午駐蹕赤勒嶺己亥倒塌嶺人進古鼎有文曰萬歲永爲寶用辛丑回鶻遣使貢方物癸卯以權知東京留守蕭陶隗爲契丹行宮都部署丁未端拱殿門災秋七月戊午朔回鶻遣使來貢異物不納厚賜遣之八月庚寅以霖雨罷獵壬寅幸慶州謁慶陵九月丙

申還上京己亥日本國遣鄭元鄭心及僧應範等二十八人  
來貢冬十月辛巳命燕國王延禧爲天下兵馬大元帥總  
北南院樞密使事十一月庚子如藕絲淀甲子望祀木葉山  
八年春正月乙酉如山榆淀乙未阻卜諸長來降三月己  
亥駐蹕撻里捨淀丁未曲赦中京蔚州役徒夏四月乙卯  
阻卜長來貢丁丑獵西山惕隱酋長胡里只來附五月甲  
辰駐蹕赤勒嶺六月乙丑夏國爲宋侵遣使乞援秋七月  
丁亥獵沙嶺九月乙巳駐蹕藕絲淀丁未日本國遣使來  
貢冬十月庚戌朔遣使遺宋鹿脯丙辰振西北路饑辛酉  
阻卜磨古斯殺金吾吐古斯以叛遣奚六部禿里耶律郭

三發諸蕃部兵討之壬申南府宰相王經薨戊寅以左夷  
离畢耶律涅里爲彰聖軍節度使十一月戊子以樞密副  
使王是敷兼知樞密院事權參知政事韓汝讓參知政事  
漢人行宮都部署奚面离保知奚六部大王事丁酉以通  
州潦水害稼遣使振之戊申北院大王合魯薨是年放進  
士冠尊文等五十三人

九年春正月庚辰如混同江二月磨古斯來侵三月西北  
路招討使耶律阿魯掃古追磨古斯還都監蕭張九遇賊  
與戰不利二室韋拽刺北王府特滿群牧官分等軍多陷  
沒夏四月乙卯興中府甘露降遣使祠佛飯僧癸酉獵西



山六月丁未朔駐蹕散水原庚申以遼興軍節度使榮哥  
爲南院大王知左夷離畢事耶律吐朵爲左夷離畢秋七  
月辛卯如黑嶺壬寅遣使賜高麗辛九月癸卯振西北路  
貧民冬十月庚戌有司奏磨古斯詣西北路招討使耶律  
撻不也僞降旣而棄虛來襲撻不也死之阻卜烏古札叛  
達里底拔思母並寇倒塌嶺壬子遣使籍諸路兵癸丑以  
南院大王特末同知南京留守事命鄭家奴率兵往援倒  
塌嶺甲寅駐蹕藕絲淀以左夷離畢耶律禿朵圍場都管  
撒八並爲西北路行軍都監乙卯詔以馬三千給烏古部  
丙辰有司奏阻卜長轄底掠西路群牧丁巳振西北路貧

民已未燕國王延禧生子肆赦妃之族屬並進級壬戌以樞密直學士趙廷睦參知政事兼同知南院樞密使事癸亥烏古敵烈統軍使蕭朽哥奏討阻卜等部捷甲子宋遣使告其母后曹氏哀即遣使弔祭己巳詔廣積貯以備水旱十一月辛巳特抹等奏討阻卜捷十二月丙辰宋遣使以母后遺留物來饋

十年春正月如春水癸未惕德來貢戊子烏古扎等來降達里底拔思母二部來侵四捷軍都監特抹死之二月甲辰以破阻卜賞有功者丙午西南面招討司奏討拔思母捷癸丑排雅僕里同葛虎骨僕果等來降達里底來侵三

月壬申朔日有食之山北路副部署蕭阿魯帶奏討達里  
底捷夏四月壬寅朔惕德萌得斯老古得等各率所部來  
附詔復舊地甲辰駐蹕春州北平淀丙午烏古部節度使  
耶律陳家奴奏討茶扎剌捷庚戌以知北院樞密使事耶  
律幹特剌爲都統夷离畢耶律禿朶爲副統龍虎衛上將  
軍耶律胡呂都監討磨古斯遣積慶宮使蕭紇里監戰辛  
亥朽哥奏頗里八部來侵擊破之己巳除玉田密雲流民  
租賦一年閏月庚子賜西北路貧民錢達里底拔思母二  
部來降五月甲辰駐蹕赤勒嶺甲寅括馬戊午西北路招  
討司奏敵烈等部來侵統軍司出兵與戰不利招討司以

兵擊破之數睦宮太師耶律愛奴及其子死之辛酉以知  
國舅詳穩事蕭阿烈同領西北路行軍事六月辛未宋遣  
使來謝弔祭乙酉烏占敵烈統軍使朽哥有罪除名丙戌  
和烈葛等部來聘癸巳惕德來貢己亥禁邊民與蕃部爲  
婚是夏高麗國王運薨子昱遣使來告即遣使賻贈秋七  
月庚子朔獵赤山是月阻卜等寇倒塌嶺盡掠西路群牧  
馬去東北路統軍使耶律石柳以兵追及盡獲所掠而還  
九月己未以南院大王特末爲南院樞密使甲子敵烈諸  
酋來降釋其罪是月幹特剌破磨古斯冬十月丙子駐蹕  
藕絲淀壬午山北路副部署蕭阿魯帶以討達里底功加

左金吾衛上將軍癸巳西北路統軍司獲阻卜長拍撒葛蒲魯等來獻十一月乙巳惕德銅刮阻卜的烈等來降達里底及拔思母等復來侵山北副部署阿魯帶擊敗之十二月癸酉三河縣民孫賓及其妻皆百歲復其家甲戌以參知政事趙廷睦兼同知樞密院事樞密副使王師儒參知政事兼同知樞密院事己卯詔錄西北路有功將士及戰歿者贈官乙酉詔改明年元減雜犯死罪以下仍除貧民租賦戊子西北路統軍司奏討磨古斯捷

本紀第二十六

遼史二十六

開府儀同三司上柱國錄軍國軍事中書省兼樞密院事都統義臣脫脫奉

勅修

道宗六

壽隆元年春正月己亥如混同江庚戌西南面招討司奏  
拔思母來侵蕭阿魯帶等擊破之乙卯振奉聖州貧民二  
月戊辰賜左右二皮室貧民錢癸酉高麗遣使來貢乙亥  
駐蹕魚兒濼三月丙午賜東北路貧民絹夏四月丁卯幹  
特刺奏討耶覲刮捷己亥女直遣使來貢庚寅錄西北路  
有功將士五月乙未朔左夷离畢耶律咥朵爲惕隱南京

宣徽使耶律特末爲北院大王癸卯贈陣亡者官丁巳駐蹕特禮嶺六月己巳以知奚六部大王事回里不爲本部大王權參知政事趙孝嚴爲漢人行宮都部署圍場都管撒八以討阻卜功加鎮國大將軍癸巳阻卜長香里底及圖木葛來貢秋七月庚子阻卜長猛達斯等來貢癸卯獵沙嶺癸丑頗里八部來附進方物甲寅幹特刺奏磨古斯捷九月甲寅祠木葉山丙辰詔西京砲人營人教西北路漢軍冬十月甲子駐蹕藕絲淀甲戌以北面林牙耶律大悲奴爲右夷离畢癸未以參知政事王師儒爲樞密副使漢人行宮都部署趙孝嚴參知政事壬辰錄討阻卜有功

將士十一月丙申女直遣使進馬己亥以都統幹特刺爲西北路招討使封漆水郡王甲辰夏國進貝多葉佛經庚申高麗王昱疾命其子顥權知國事十二月癸亥朔以知北院樞密使事耶律阿思爲北院樞密使是年放進主陳衡甫等百三十人

二年春正月甲午如春水癸卯西南面招討司討拔思母破之乙卯駐蹕瑟尼思辛酉市牛給烏古敵烈隈烏古部貧民二月癸亥振達麻里別古部夏四月己卯振西北邊軍六月辛酉駐蹕撒里乃秋七月甲午阻卜來貢丙午獵赤山八月乙丑頗里八部進馬九月丙午徙烏古敵烈部



于烏納水以扼北邊之衝冬十月戊辰駐蹕藕絲淀庚辰  
高麗遣使來貢十二月己未幹特刺討梅里急破之壬戌  
南府宰相耶律鐸魯幹致仕癸亥肅撻不也爲北府宰相  
耶律大悲奴殿前都點檢乙亥夏國獻宋俘

三年春正月丁亥如春水壬寅烏古部節度使耶律陳家  
奴以功加尚書右僕射癸卯駐蹕雙山二月甲辰朔南京  
水遣使振之丙午阻卜長猛撒葛粘八葛長禿骨撒梅里  
急長忽魯八等請復舊地貢方物從之三月辛酉燕國王  
延禧生子癸亥賜名撻魯妃之父長哥遷左監門衛上將  
軍仍賜官屬錢是春高麗王昱薨夏四月南府宰相趙廷

睦出知興中府事參知政事牛溫舒兼同知樞密院事五月癸亥幹特刺討阻卜破之己巳駐蹕撒里乃六月甲申詔罷諸路馳駟貢新丙戌詔每冬駐蹕之所宰相以下構宅母役其民辛丑夏人來告宋城要地遣使之宋諭與夏和庚戌以契丹行宮都部署耶律吾也爲南院大王秋七月壬子朔獵黑嶺八月己亥蒲盧毛朶部長率其民來歸乙巳彗星見西方九月壬申駐蹕藕絲淀丁丑以武定軍節度使梁援爲漢人行宮都部署戊寅幹特刺奏討梅里急捷己卯五國部長來貢冬十月庚戌以西北路招討使幹特刺爲南府宰相十一月乙卯蒲盧毛朶部來貢戊午

通鑑卷一百一十五  
以安車召鑿巫閭山僧志達己未以中京留守韓資讓知樞密院事同知南院樞密使事蕭藥師奴知右夷離畢丁丑西北路統軍司奏討梅里急捷

四年春正月壬子如魚兒濼己巳徙阻卜等貧民于山前辛未宋遣使來饋錦綺三月庚午幸春州丙子有司奏黃河清夏四月辛丑以雨罷獵五月癸酉那也奏北邊捷甲戌駐蹕撒里乃六月戊寅朔夏國爲宋所攻遣使求援丁亥以遼興軍節度使涅里爲惕隱前知惕隱事耶律郭三爲南京統軍使甲午以參知政事牛溫舒兼知中京留守事秋七月戊午如黑嶺冬十月乙亥朔駐蹕藕絲淀己卯

以南府宰相幹特刺兼契丹行宮都部署以傳導燕國王  
延禧十一月乙巳朔知右夷離畢事蕭藥師奴樞密直學  
士耶律儼使宋諷與夏和辛酉夏復遣使求援十二月壬  
辰爲燕國王延禧行再生禮曲赦三百里內囚

五年春正月乙巳如魚兒灤己酉詔夏國王李乾順伐拔  
思母等部夏五月壬戌藥師奴等使宋廻奏宋罷兵癸亥  
謁乾陵戊辰以南府宰相幹特刺兼西北路招討使楚瑩  
都統己巳駐蹕汾柳湖六月甲申以奚六部大王回離保  
爲契丹行宮都部署知右夷離畢事蕭藥師奴南面林牙  
兼知契丹行宮都部署事乙未五國部長來朝戊戌阻卜

通鑑卷一百一  
來貢己亥以興聖宮使耶律郝家奴爲右夷離畢秋七月  
壬寅朔惕德長禿的等來貢辛亥如大牢古山閏九月丙  
子駐蹕獨盧金冬十月己亥朔高麗王顥遣使乞封冊丁  
巳幹特刺奏討耶覲刮捷丙寅以同知南京留守事蕭得  
里底知北院樞密使事丁卯宋遣郭知章曹平來聘戊辰  
振遼州饑仍免租賦一年十一月甲戌振南北二紂乙酉  
夏國以宋罷兵遣使來謝十二月甲子以參知政事趙孝  
嚴爲漢人行宮都部署漢人行宮都部署梁援爲遼興軍  
節度使

六年春正月癸酉南院大王耶律吾也薨壬午以太師致

仕禿開起爲奚六部大王丁亥如春水辛卯幹特刺執磨  
古斯來獻丙申詔問民疾苦二月丁未以烏古部節度使  
陳家奴爲南院大王己酉礪磨古斯于市癸丑出絹賜五  
院貧民辛酉宋遣使告宋主煦殂弟佶嗣位即日遣使弔  
祭三月甲申弛朔州山林之禁夏四月丁酉朔日有食之  
癸卯如炭山五月壬午烏古部討茶扎刺破之乙酉漢人  
行宮都部署趙孝嚴薨丙戌駐蹕納葛灤辛卯宋遣使饋  
先帝遺物乙未以東京留守何魯掃古爲惕隱南院宣徽  
使蕭常哥爲漢人行宮都部署六月庚子遣使賀宋主辛  
丑以有司案牘書宋帝嗣位爲登寶位詔奪宰相鄭顥以

下官出額知興中府事韓資讓爲崇義軍節度使御史中丞韓君義爲廣順軍節度使癸丑阻卜長來貢戊午遣使決五京滯獄己未以遼興軍節度使梁援爲樞密副使秋七月庚午如沙嶺壬申耶覲刮諸部寇西北路八月幹特刺以兵擊敗之使來獻捷九月癸未望祠木葉山戊子駐蹕藕絲淀冬十月壬寅以樞密副使王師儒監修國史癸卯五國諸部長來貢甲寅以平州饑復其租賦一年十一月壬申以天德軍民田世榮三世同居詔官之令一子三班院祗候丙子召鑒巫閭山僧志達設壇於內殿戊子夏國王李乾順遣使請尚公主十二月乙未女直遣使來貢

已亥以知右夷離畢事郝家奴爲北面林牙辛亥詔燕國  
王延禧擬注大將軍以下官庚申鐵驪來貢宋遣使來謝  
帝不豫是歲封高麗王顯爲三韓國公放進士康秉儉等  
八十七人

七年春正月壬戌朔力疾御清風殿受百官及諸國使賀  
是夜白氣如練自天而降黑雲起于西北疾飛有聲北有  
青赤黑白氣相雜而落癸亥如混同江甲戌上崩于行宮  
年七十遺詔燕國王延禧嗣位六月庚子上尊謚仁聖大  
孝文皇帝廟號道宗

贊曰道宗初即位求直言訪治道勸農興學救菑恤患粲



然可觀及夫謗訕之令旣行告訐之賞日重群邪並興讒  
巧競進賊及骨肉皇基寢危衆正淪胥諸部反側甲兵之  
用無寧歲矣一歲而飯僧三十六萬一日而祝髮三千徒  
勤小惠蔑計大本尚足與論治成

本紀第二十六

本紀第二十七

遼史二十七

開府儀同三司上柱國錄軍國重事中書右丞相監修國史領經筵事都總裁臣滕康奉

勅修

天祚皇帝一

天祚皇帝諱延禧字延寧小字阿果道宗之孫父順宗大  
孝順聖皇帝母貞順皇后蕭氏大康元年生六歲封梁王  
加守太尉兼中書令後三年進封燕國王大安七年總北  
南院樞密使事加尚書令爲天下兵馬大元帥壽隆七年  
正月甲戌道宗崩奉遺詔即皇帝位于柩前群臣上尊號  
曰天祚皇帝二月壬辰朔改元乾統大赦詔爲耶律乙辛

所誣陷者復其官爵籍沒者出之流放者還之乙未遣使  
告哀于宋及西夏高麗乙巳以北府宰相蕭允納爲遼興  
軍節度使加守太傅三月丁卯詔有司以張孝傑家屬分  
賜群臣甲戌召僧法願放戒于內庭夏四月旱六月庚寅  
朔如慶州甲午宋遣王潛等來弔祭丙申高麗夏國各遣  
使慰奠戊戌以南府宰相幹特刺兼南院樞密使庚子追  
謚懿德皇后爲宣懿皇后壬寅以宋魏國王和魯幹爲天  
下兵馬太元帥乙巳以北平郡王渾進封鄭王丁未北院  
樞密使耶律阿思加于越辛亥葬仁聖大孝文皇帝宣懿  
皇后于慶陵秋七月癸亥阻卜鐵驪來貢八月甲寅謁慶

陵九月壬申謁懷陵乙亥駐蹕藕絲淀冬十月壬辰謁乾陵甲辰上皇考昭懷太子謚曰大孝順聖皇帝廟號順宗皇妣曰貞順皇后十二月戊子以樞密副使張琳知樞密院事翰林學士張奉珪參知政事兼同知樞密院事癸巳宋遣黃寶來賀卽位丁酉高麗夏國並遣使來賀乙巳詔先朝已行事不得陳告初以楊割爲生女直部節度使其俗呼爲太師是歲楊割死傳于兄之子烏雅東東死其弟阿骨打襲

二年春正月如鴨子河二月辛卯如春州三月大寒冰復合夏四月辛亥詔誅乙辛黨徙其子孫于邊發乙辛得里

特之墓剖棺戮屍以其家屬分賜被殺之家五月乙丑幹  
特刺獻耶覲剖等部捷六月壬辰以兩罷獵駐蹕散水原  
丙午夏國王李乾順復遣使請尚公主丁未南院大王陳  
家奴致仕壬子李乾順爲宋所攻遣李造福田若水求援  
閏月庚申策賢良壬申降惠妃爲庶人秋七月獵黑嶺以  
霖雨給獵人馬阻卜來侵幹特刺等戰敗之冬十月乙卯  
蕭海里叛劫乾州武庫器甲命北面林牙郝家奴捕之蕭  
海里亡入陪木水阿典部丙寅以南府宰相耶律幹特刺  
爲北院樞密使參知政事牛溫舒知南院樞密使事十一  
月乙未郝家奴以不獲蕭海里免官壬寅以上京留守耶

律慎思爲北院樞密副使有司請以帝生日爲天興節  
三年春正月辛巳朔如混同江女直函肅海里首遣使來  
獻戊申如春州二月庚午以武清縣大水弛其陂澤之禁  
夏五月戊子以獵人多亡嚴立科禁乙巳清暑赤勸嶺丙  
午謁慶陵六月辛酉夏國王李乾順復遣使請尚公主秋  
七月中京雨雹傷稼冬十月甲辰如中京己未吐蕃遣使  
來貢庚申夏國復遣使求援己巳有事于觀德殿十一月  
丙申文武百官加上尊號曰惠文智武聖孝天祚皇帝大  
赦以宋魏國王和魯幹爲皇大叔梁王撻魯進封燕國王  
鄭王淳爲東京留守進封越國王百官各進一階丁酉以

通鑑九十一  
惕隱耶律何魯掃古爲南院大王戊戌以受尊號告廟乙巳謁太祖廟追尊太祖之高祖曰昭烈皇帝廟號肅祖妣曰昭烈皇后魯祖曰莊敬皇帝廟號懿祖妣曰莊敬皇后召監修國史耶律儼纂太祖諸帝實錄十二月戊申如藕絲淀是年放進士馬恭回等百三人

四年春正月戊子幸魚兒灤壬寅獵木嶺癸卯燕國王撻魯薨二月丁丑鼻骨德遣使來貢夏六月甲辰駐蹕旺國崖甲寅夏國遣李造福田若水求援癸亥吐蕃遣使來貢秋七月南京蝗庚辰獵南山癸未以西北路招討使蕭得里底北院樞密副使耶律慎思並知北院樞密使事辛卯

以同知南院樞密使事蕭敵里爲西北路招討使冬十月  
己酉鳳凰見于遼陰己未幸南京十一月乙亥御迎月樓  
賜貧民錢十二月辛丑以張琳爲南府宰相

五年春正月乙亥夏國遣李造福等來求援且乞伐宋庚  
寅以遼興軍節度使蕭常哥爲北府宰相丁酉遣樞密直  
學士高端禮等諷宋罷伐夏兵二月癸卯微行視民疾苦  
丙午幸鴛鴦渚三月壬申以族女南仙封成安公主下嫁  
夏國王李乾順夏四月甲申射虎炭山五月癸卯清暑南  
崖士子宋遣曾孝廣王馘報聘六月甲戌夏國遣使來謝  
及貢方物己丑幸候里吉秋七月謁慶陵九月辛亥主畢馬蹕



竊絲浞乙卯謁乾陵冬十一月戊戌禁商賈之家應進士  
舉丙辰高麗三韓國公王顥薨子俱遣使來告十二月己  
巳夏國復遣李造福田若水求援癸酉宋遣林洙來議與  
夏約和

六年春正月辛丑遣知北院樞密使蕭得里底知南院樞  
密使事牛溫舒使宋諷歸所侵夏地夏五月清暑散水原  
六月辛巳夏國遣李造福等來謝秋七月癸巳阻卜來貢  
甲午如黑嶺庚子獵鹿角山冬十月乙亥宋與夏通好遣  
劉正符曹穆來告庚辰以皇太叔南京留守和魯幹兼惕  
隱東京留守越國王淳爲南府宰相十一月乙未以謝家

奴爲南院大王馬奴爲奚六部大王丙申行柴冊禮戊戌大赦以和魯幹爲義和仁聖皇太叔越國王淳進封魏國王封皇子敖盧幹爲晉王習泥烈爲饒樂郡王己亥謁太祖廟甲辰祠木葉山十二月己巳封耶律儼爲漆水郡王餘官進爵有差

七年春正月鈎魚于鴨子河二月駐蹕大魚濼夏六月次散水原秋七月如黑嶺冬十月謁乾陵獵擊巫閭山是年放進士李石等百人

八年春正月如春州夏四月丙申封高麗王俱爲三韓國公贈其父顯爲高麗國王五月清暑散水原六月壬辰西

北路招討使蕭敵里率諸蕃來朝丙申射柳祈雨壬寅夏  
國王李乾順以成安公主生子遣使來告丁未如黑嶺秋  
七月戊辰以雨罷獵冬十二月己卯高麗遣使來謝

九年春正月丙午朔如鴨子河二月如春州三月戊午夏  
國以宋不歸地遣使來告夏四月壬午五國部來貢六月  
乙亥清暑特禮嶺秋七月隕霜傷稼甲寅獵于候里吉八  
月丁酉雪罷獵冬十月癸酉望祠木葉山丁丑詔免今年  
租稅十二月甲申高麗遣使來貢是年放進士劉楨等九  
十人

十年春正月辛丑預行立春禮如鴨子河二月庚午朔駐

蹕大魚灤夏四月丙子五國部長來貢丙戌預行再生禮  
癸巳獵于北山六月甲戌清暑王立癸未夏國遣李造福  
等來貢甲午阻卜來貢秋七月辛丑謁慶陵閏月辛亥謁  
懷陵己未謁祖陵壬戌皇太叔和魯幹薨九月甲戌免重  
九節禮冬十月駐蹕藕絲淀十二月己酉改明年元是歲  
大饑

天慶元年春正月鈎魚于鴨子河二月如春州三月乙亥  
五國部長來貢夏五月清暑散水原秋七月獵冬十月駐  
蹕藕絲淀

二年春正月己未朔如鴨子河丁丑五國部長來貢二月

丁酉如春州幸混同江釣魚界外生女直酋長在千里內者以故事皆來朝適遇頭魚宴酒半酣上臨軒命諸酋次第起舞獨阿骨打辭以不能諭之再三終不從他日上密謂樞密使蕭奉先曰前日之燕阿骨打意氣雄豪顧視非常可託以邊事誅之否則必貽後患奉先曰麓人不知禮義無大過而殺之恐傷向化之心假有異志又何能爲其弟吳乞買粘罕胡舍等嘗從獵能呼鹿刺虎搏熊上喜輒加官爵夏六月庚寅清暑南崖甲午和州回鶻來貢戊戌成安公主來朝甲辰阻卜來貢秋七月乙丑獵南山九月己未射獲熊燕群臣上親御琵琶初阿骨打混同江宴歸

疑上知其異志遂稱兵先併旁近部族女直趙三阿鶻產  
拒之阿骨打虜其家屬二人走訴咸州詳穩司送北樞密  
院樞密使蕭奉先作常事以聞上仍送咸州詰責欲使自  
新後數召阿骨打竟稱疾不至冬十月辛亥高麗三韓國  
公王俟之母死來告即遣使致祭起復是月駐蹕奉聖州  
十一月乙卯幸南京丁卯謁太祖廟是年放進士韓昉等  
七十七人

三年春正月丙寅賜南京貧民錢丁卯如大魚灤甲戌禁  
僧尼破戒丙子獵狗牙山大寒獵人多死三月籍諸道戶  
徙大牢古山圍場地居民于別土阿骨打一日率五百騎

突至咸州吏民大驚翌日赴詳穩司與趙三等面折庭下  
阿骨打不屈送所司問狀一夕遁去遣人訴于上謂詳穩  
司欲見殺故不敢留自是召不復至夏閏四月李弘以左  
道聚衆爲亂支解分示五京六月乙卯幹朗改國遣使來  
貢良犬丙辰夏國遣使來貢秋七月幸秋山九月駐蹕藕  
絲淀十一月甲午以三司使虞融知南院樞密使事西南  
面招討使蕭樂古爲南府宰相十二月庚戌高麗遣使來  
謝致祭癸丑面鵲遣使來貢甲寅以樞密直學士馬人望  
參知政事丙辰知樞密院事耶律儼薨癸亥高麗遣使來  
謝起復

四年春正月如春州初女直起兵以紇石烈部人阿疎不從遣其部撒改討之阿疎弟狄故保來告詔諭使勿討不聽阿疎來奔至是女直遣使來索不發夏五月清暑散水原秋七月女直復遣使取阿疎不發乃遣侍御阿息保問上多建城堡之故女直以慢語答曰若還阿疎朝貢如故不然城未能已遂發渾河北諸軍益東北路統軍司阿骨打乃與弟粘罕胡舍等謀以銀术割移剌婁室闍母等爲帥集女直諸部兵擒遼降虜官及攻寧江州東北路統軍司以聞時上在慶州射鹿聞之畧不介意遣海州刺史高仙壽統渤海軍應援蕭撻不也遇女直戰于寧江東敗



績十月壬寅以守司空蕭嗣先爲東北路都統靜江軍節度使蕭捷不也爲副發契丹奚軍三千人中京禁兵及土豪二千人別選諸路武勇二千餘人以盧候崔公義爲都押官控鶴指揮邢頴爲副引軍屯出河店兩軍對壘女直軍潛渡混同江掩擊遼衆蕭嗣先軍潰崔公義邢頴耶律佛留蕭葛十等死之其獲免者十有七人蕭奉先懼其弟嗣先獲罪輒奏東征潰軍所至刼掠若不肆赦恐聚爲患上從之嗣先但免官而已諸軍相謂曰戰則有死而無功退則有生而無罪故士無鬪志望風奔潰十一月壬辰都統蕭敵里等營于幹鄰樂東又爲女直所襲士卒死者甚

癸甲午蕭敵里亦坐免官辛丑以西北路招討使耶律幹  
里朶爲行軍都統副點檢蕭乙薛同知南院樞密使事耶  
律章奴副之十二月咸賓祥三州及鐵驪兀惹皆叛入女  
直乙薛往援賓州南軍諸將實妻特烈等往援咸州並爲  
女直所敗

本紀第二十七

通鑑

九

卷九

本紀第二十八

遼史二十八

開府儀同三司柱國錄軍國重事平章丞相監修國史領經筵事都總裁臣脫脫奉

勅修

天祚皇帝二

五年春正月下詔親征遣僧家奴持書納和斤阿骨打名  
阿骨打遣賽剌復書若歸叛人阿疎遷黃龍府於別地然  
後議之都統耶律幹里朶等與女直兵戰于達魯古城敗  
績二月饒州渤海古欲等反自稱大王三月以蕭謝佛留  
等討之遣耶律張家奴等六人齎書使女直斥其主名巢  
以速降夏四月癸丑蕭謝佛留等爲渤海古欲所敗以南

面副部署蕭陶蘇幹爲都統赴之五月陶蘇幹及古欲戰敗績張家奴等以阿骨打書來復遣之往六月己亥朔清暑特禮嶺壬子張家奴等還阿骨打復書亦斥名諭之使降癸丑以親征諭諸道丙辰陶蘇幹招獲古欲等癸亥以惕隱耶朮末里爲北院大王是月遣蕭辭刺使女直以書辭不屈見留秋七月辛未宋遣使致助軍銀絹丙子獵于嶺東是月都統幹里朶等與女直戰于白馬濼敗績八月甲子罷獵趨軍中以幹里朶等軍敗免官丙寅以圍場使阿不爲中軍都統耶律張家奴爲都監率番漢兵十萬蕭奉先充御營都統諸行營都部署耶律章奴爲副以精兵

二萬爲先鋒餘分五部爲正軍貴族子弟千人爲硬軍扈從百司爲護衛軍北出駱駝口以都點檢蕭胡覩姑爲都統樞密直學士柴誼爲副將漢步騎三萬南出寧江州自長春州分道而進發數月糧期必滅女直九月丁卯朔女直軍陷黃龍府已已知北院樞密使蕭得里底出爲西南面招討使辭刺還女直復遣賽刺以書來報若歸我叛人阿疎等即當班師上親征粘罕兀朮等以書來上陽爲卑哀之辭實欲求戰書上上怒下詔有女直作過大軍翦除之語女直主聚衆勢面仰天慟哭曰始與汝等起兵蓋苦契丹殘忍欲自立國今主上親征奈何非人死戰莫能當

也不若殺我一族汝等迎降轉禍爲福諸軍皆曰事已至此惟命是從乙巳耶律章奴反奔上京謀迎立魏國王淳上遣駙馬蕭昱領兵詣廣平淀護后妃行宮小底乙信持書馳報魏國王時章奴先遣王妃親弟蕭諦里以所謀說魏國王王曰此非細事主上自有諸王當立北南面大臣不來而汝言及此何也密令左右拘之有頃乙信等賁御札至備言章奴等欲廢立事魏國王立斬蕭諦里等首以獻單騎間道詣廣平淀待罪上遇之如初章奴知魏國王不聽率麾下掠慶饒懷祖等州結渤海群盜衆至數萬趨廣平淀犯行宮順國女直阿鶻產以三百騎一戰而勝擒

其貴族二百餘人並斬首以徇其妻子配役繡院或散諸  
近侍爲婢餘得脫者皆奔女直章奴詐爲使者欲奔女直  
爲邏者所獲縛送行在腰斬于市剖其心以獻祖廟支解  
以徇五路冬十一月遣駙馬蕭特末林牙蕭察刺等將騎  
兵五萬步卒四十萬親軍七十萬至駝門十二月乙巳耶  
律張家奴叛戊申親戰于護步答岡敗績盡亡其輜重已  
未錦州刺史耶律朮者叛應張家奴庚申北面林牙耶律  
馬哥討張家奴癸亥以北院宣徽使蕭韓家奴知北院樞  
密使事南院宣徽使蕭特末爲漢人行宮都部署

六年春正月丙寅朔東京夜有惡少年十餘人乘酒執刃



踰垣入留守府問留守蕭保先所在今軍變請爲備蕭保先出刺殺之戶部使太公鼎聞亂即攝留守事與副留守高清明集奚漢兵千人盡捕其衆斬之撫定其民東京故渤海地太祖力戰二十餘年乃得之而蕭保先嚴酷渤海苦之故有是變其裨將渤海高永昌僭號稱隆基元年遣蕭乙薛高興順招之不從閏月己亥遣蕭韓家奴張琳討之戊午貴德州守將耶律余覲以廣州渤海叛附永昌我師擊敗之二月戊辰侍御司徒撻不也等討張家奴戰于祖州敗績乙酉遣漢人行宮都部署蕭特末率諸將討張家奴戊子張家奴誘饒州渤海及中京賊侯罕等萬餘人

攻陷高州三月東面行軍副統酬幹等擒侯槃于川州夏  
四月戊辰親征張家奴癸酉敗之甲戌誅叛黨饒州渤海  
平丙子賞平賊將士有差而蕭韓家奴張琳等復爲賊所  
敗五月清暑散水原女直軍攻下瀋州復陷東京擒高永  
昌東京州縣族人痕孛鐸刺吳十撻不也道刺酬幹等十  
三人皆降女直六月乙丑籍諸路兵有雜畜十頭以上者  
皆從軍庚辰魏國王淳進封秦晉國王爲都元帥上京留  
守蕭撻不也爲契丹行宮都部署兼副元帥丁亥知北院  
樞密使事蕭韓家奴爲上京留守秋七月獵秋山春州渤  
海二千餘戶叛東北路統軍使勒兵追及盡俘以還八月

烏古部叛遣中丞耶律撻不也等招之九月丙午謁懷陵  
冬十月丁卯以張琳軍敗奪官庚辰烏古部來降十一月  
東面行軍副統馬哥等攻曷蘇館敗績十二月乙亥封庶  
人蕭氏爲太皇太妃辛巳削副統耶律馬哥官

七年春正月甲寅減廐馬粟分給諸局是月女直軍攻春  
州東北面諸軍不戰自潰女古皮室四部及渤海人皆降  
復下泰州二月涑水縣賊董龐兒聚衆萬餘西京留守蕭  
乙薛南京統軍都監查剌與戰于易水破之三月龐兒黨  
復聚乙薛復擊破之于奉聖州夏五月庚寅東北面行軍  
諸將涅里合魯涅哥虛古等棄市乙巳諸圍場隙地縱百

姓樵採六月辛巳以同知樞密院事余里也爲北院大王  
秋七月癸卯獵秋山八月丙寅獵狨斯那里山命都元帥  
秦晉非赴汾邊會四路兵馬防秋九月上自燕至陰涼河  
置戍軍八營募自宜州者曰前戍後宜自錦州者曰前錦後  
錦自乾自顯者曰乾曰顯又有乾顯大營岩州營凡二萬  
八千餘人屯衛州蒺藜山丁酉獵輞子山冬十月乙卯朔  
至中原十二月丙寅都元帥秦晉國王淳遇女直軍戰于  
蒺藜山敗績女直復拔顯州旁近州郡庚午下詔自青癸  
酉遣夷離畢查剌與大食鼎諸路募兵丁丑以西京留守  
蕭乙薛爲北府宰相東北路行軍都統奚霞未知奚六部

通鑑九  
五  
大王事是歲女直阿骨行用鐵州楊朴策即皇帝位建元天輔國號金楊朴又言自古英雄開國或受禪必先求大國封冊遂遣使議和以求封冊

八年春正月幸鴛鴦濼丁亥遣耶律奴哥等使金議和庚寅保安軍節度使張崇以雙州二百戶降金東路諸州盜賊蜂起掠民自隨以充食二月耶律奴哥還自金金主復書曰能以兄事朕歲貢方物歸我上中京興中府三路州縣以親王公主駙馬大臣子孫爲質還我行人及元給信符并宋夏高麗往復書詔表牒則可以如約三月甲午復遣奴哥使金夏四月辛酉以西南面招討使蕭得里底爲

北院樞密使五月壬午朔奴哥以書來約不踰此月見報  
戊戌復遣奴哥使金要以酌中之議是月至納葛濼賊安  
生兒張高兒聚衆二十萬耶律馬哥等斬生兒于龍化州  
高兒亡入懿州與霍六哥相合金主遣胡突來與奴哥持  
書報如前約六月丁卯遣奴哥等齎宋夏高麗書詔表牒  
至金霍六哥陷海北州趣義州軍帥回離保等擊敗之通  
棋雙遼四州之民八百餘戶降于金秋七月獵秋山金復  
遣胡突來來免取質子及上京興中府所屬州郡裁減歲  
幣之數如能以兄事朕冊用漢儀可以如約八月庚午遣  
奴哥突迭使金議冊禮九月突迭見留遣奴哥還謂之曰

言如不從勿復遣使閏月丙寅遣奴哥復使金而蕭寶訛里等十五人各率戶降于金冬十月奴哥突迭持金書來龍化州張應古等四人率衆降金十一月副元帥蕭撻不也薨十二月甲申議定冊禮遣奴哥使金寧昌軍節度使劉宏以懿州戶三千降金時山前諸路大饑乾顯宜錦興中等路斗粟直數緡民削榆皮食之旣而人相食是年放進士王暉等百三人

九年春正月金遣烏林答贊謨持書來迎冊二月至鴛鴦灤賊張撒八誘中京射糧軍偕號南面軍帥余覲擒撒八三月丁未朔遣知右夷离畢事蕭習泥列等冊金主爲東

懷國皇帝己酉烏林荅贊謨奴哥等先以書報夏五月阻  
卜補疎只等叛執招討使耶律幹里朶都監蕭斜里得死  
之秋七月獵南山金復遣烏林荅贊謨來責冊文無兄事  
之語不言大金而云東懷乃小邦懷其德之義及冊文有  
渠材二字語涉輕侮若遙芬多戩等語皆非善意殊乖體  
式如依前書所定然後可從楊詢卿羅子韋率衆降金八  
月以趙王習泥烈爲西京留守九月至西京復遣習泥烈  
楊立忠先持冊藁使金冬十月甲戌朔耶律陳圖奴等二  
十餘人謀反伏誅是月遣使送烏林荅贊謨持書以還  
十年春二月幸鴛鴦濼金復遣烏林荅贊謨持書及冊文



副本以來仍責乞兵于高麗三月己酉民有群馬者十取其  
一給東路軍庚申以金人所定大聖二字與先世稱號  
同復遣習泥烈往議金主怒遂絕之夏四月獵胡土白山  
聞金師再舉耶律白斯不等選精兵三千以濟遼師五月  
金主親攻上京克外郭留守撻不也率衆出降六月乙酉  
以北府宰相蕭乙薛爲上京留守知鹽鐵內省兩司東北  
統軍司事秋獵沙嶺冬復至西京

本紀第二十九

遼史二十九

開府儀同三司上柱國錄軍國重事中書右丞相監修國史領經筵事都總裁臣脫脫奉

勅修

天祚皇帝三

保大元年春正月丁酉朔改元肆赦初金人興兵郡縣所  
失幾半上有四子長趙王母趙昭容次晉王母文妃次秦  
王許王皆元妃生國人知晉王之賢深所屬望元妃之兄  
樞密使蕭奉先恐秦王不得立潛圖之文妃姊妹三人長  
適耶律撻曷里次文妃次適余覲一日其姊若妹俱會軍  
前奉先諷人誣駙馬蕭昱及余覲等謀立晉王事覺昱撻

曷里等伏誅文妃亦賜死獨晉王未忍加罪余覲在軍中聞之大懼即率千餘騎叛入金上遣知奚王府事蕭遐買北府宰相蕭德恭太常衣耶律諦里姑歸州觀察使蕭和尚奴四軍太師蕭幹將所部兵追之及諸間山縣諸將議曰主上信蕭奉先言奉先視吾輩蔑如也余覲乃宗室豪俊常不肯爲奉先下若擒余覲他日吾黨皆余覲也不若縱之還即給曰追襲不及奉先旣見余覲之亡恐後日諸校亦叛遂勸驟加爵賞以結衆心以蕭遐買爲奚王蕭德恭試中書門下平章事兼判上京留守事耶律諦里姑爲龍虎衛上將軍蕭和尚奴金吾衛上將軍蕭幹鎮國大將

軍二月辛鴛鴦灤夏五月至曷里城秋七月獵炭山九月  
至南京冬十一月癸亥以西京留守趙王習泥烈爲惕隱  
二年春正月乙亥金克中京進下澤州上出居庸關至鴛  
鴦灤聞余覲引金人婁室孛董奄至蕭奉先曰余覲乃王  
子班之苗裔此來欲立甥晉王耳若爲社稷計不惜一子  
明其罪誅之可不戰而余覲自殞矣上遂賜晉王死素服  
三日耶律撒八等皆伏誅王素有人望諸軍聞其死無不  
流涕由是人心解體余覲引金人逼行宮上率衛兵五千  
餘騎幸雲中遺傳國璽于桑乾河二月庚寅朔日有食之  
旣甲午知北院大王事耶律馬哥漢人行宮都部署蕭特

末並爲都統大和宮使耶律補得副之將兵屯鴛鴦灤己  
亥金師敗奚王霞末非北安州遂降其城三月辛酉上聞  
金師將出嶺西遂趨白水灤乙丑群牧使謨魯幹降金丙  
寅上至女古底倉聞金兵將近計不知所出乘輕騎入夾  
山方悟奉先之不忠怒曰汝父子誤我至此今欲誅汝何  
益于事恐軍心忿怨爾曹避敵苟安禍必及我其勿從行  
奉先下馬哭拜而去行未數里左右執其父子縛送金兵  
金人斬其長子昂以奉先及其次子昱械送金主道遇遼  
軍奪以歸國遂並賜死逐樞密使蕭得里底召撻不也典  
禁衛丁卯以北院樞密副使蕭僧孝奴知北院樞密使事

同知北院樞密使事蕭查刺爲左夷萬戶戊辰同知殿前  
點檢事耶律高八率衛士降金已僉人蕭和尚牌印郎  
君耶律哂斯爲金師所獲癸酉以諸局百工多亡凡扈從  
不限吏民皆官之初詔留宰相張琳李處溫與秦晉國王  
淳守燕處溫聞上入夾山數日命令不通即與弟處能子  
璵外假怨軍內結都統蕭幹謀立淳遂與諸大臣耶律大  
石左企弓虞仲文曹勇義康公弼集蕃漢百官諸軍及父  
老數萬人詣淳府處溫邀張琳至白其事琳曰攝政則可  
處溫曰天意人心已定請立班耳處溫等請淳受禮淳方  
出李璵持赭袍被之令百官拜舞山呼淳驚駭再三辭不

獲已而從之以處溫守太尉左企弓守司徒曹勇義知樞密院事虞仲文參知政事張琳守太師李處能直樞密院李奭爲少府少監提舉翰林醫官李奭陳祕十餘人曾與大計並賜進士及第授官有差蕭幹爲北樞密使駙馬都尉蕭旦知樞密院事改怨軍爲常勝軍於是肆赦自稱天錫皇帝改元建福降封天祚爲湘陰王遂據有燕雲平及上京遼西六路天祚所有沙漠已北西南西北路兩都招討府諸蕃部族而已夏四月辛卯西南面招討使耶律佛頂降金雲內寧邊東勝等州皆降阿疎爲金兵所擒金已取西京沙漠以南部族皆降上遂遁於訛沙烈時北部謨

葛失驢馬馳食羊五月甲戌都統馬哥收集散亡會于溫里謹丙子以馬哥知北院樞密使事兼都統六月淳寢疾聞上傳檄天德雲內朔武應蔚等州合諸蕃精兵五萬騎約以八月入燕并遣人問勞索衣裘茗藥淳甚驚命南北面大臣議而李處溫蕭幹等有迎秦拒湘之說集蕃漢百官議之從其議者東立惟南面行營都部署耶律寧西立處溫等問故寧曰天祚果能以諸蕃兵大舉奪燕則是天數未盡豈能拒之否則秦湘父子也拒則皆拒自古安有迎子而拒其父者處溫等相顧微笑以寧扇亂軍心欲殺之淳歎枕長歎曰彼忠臣也焉可殺天祚果來吾有死耳



復何面目相見耶已而淳死衆乃議立其妻蕭氏爲皇太后主軍國事奉遺命迎立天祚次子秦王定爲帝太后遂稱制改元德興處溫父子懼禍南通童貫欲挾蕭太后納土于宋北通于金欲爲內應外以援立大功自陳蕭太后罵曰誤秦晉國王者皆汝父子悉數其過數十賜死戮其子奭而磔之籍其家得錢七萬緡金玉寶器稱是爲宰相數月之間所取也謨葛失以兵來援爲金人敗于洪灰水擒其子陀古及其屬阿敵音夏國援兵至亦爲金所敗秋七月丁巳朔敵烈部皮室叛烏古部節度使耶律棠古討平之加太子太保乙丑上京毛八十率二千戶降金辛未

夏國遣曹价來問起居八月戊戌親遇金軍戰于石輦驛  
敗績都統蕭特末及其姪撒古被執辛丑會軍于歡撻新  
查刺金兵追之急棄輜重以遁九月敵烈部叛都統馬哥  
克之冬十月金兵攻蔚州降十一月乙丑聞金兵至奉聖  
州遂率衛兵屯于落昆髓秦晉王淳妻蕭德妃五表于金  
求立秦王不許以勁兵守居庸及金兵臨關厓石自崩戍  
卒多壓死不戰而潰德妃出古北口趨天德軍十二月知  
金主撫定南京上遂由埽里關出居四部族詳穩之家  
三年春正月丁巳奚王回离保僭號稱天復元年命都統  
馬哥討之甲子初張穀爲遼興軍節度副使民推穀領州

事秦晉王淳旣死蕭德妃遣時立愛知平州穀知遼必亡  
練兵畜馬籍丁壯爲備立愛至穀弗納金帥粘罕入燕首  
問平州事於故參知政事康公弼公弼曰穀狂妄寡謀雖  
有鄉兵彼何能爲示之不疑圖之未晚金人招時立愛赴  
軍前加穀臨海軍節度使仍知平州旣而又欲以精兵三  
千先下平州擒張穀公弼曰若加兵是趣之叛也公弼請  
自往覘之穀謂公弼曰遼之八路七路已降獨平州未解  
甲者防蕭幹耳厚賂公弼而還公弼復粘罕曰彼無足慮  
金人遂改平州爲南京加穀試中書門下平章事判留守  
事庚辰宜錦乾顯成川豪懿等州相繼皆降上京盧彥綸

叛殺契丹人二月乙酉朔興中府降金來州歸德軍節度使田顯權隰州刺史杜師回權遷州刺史高永昌權閏州刺史張成皆籍所管戶降金丙戌誅蕭德妃降淳爲庶人盡釋其黨癸巳興中宜州復城守三月駐蹕于雲內州南夏四月甲申朔以知北院樞密使蕭僧孝奴爲諸道大都督丙申金兵至居庸關擒耶律大石戌戌金兵圍輜重于青塚硬寨大保特母哥竊梁主雅里以遁秦王許王諸妃公主從臣皆陷沒庚子梁宋大長公主特里亡歸壬寅金遣人來招癸卯答言請和丙午金兵送族屬輜重東行乃遣兵邀戰于白水灤趙王習泥烈蕭道寧皆被執上遣牌

印郎君謀盧瓦送兔紐金印偽降遂西遁雲內駙馬都尉  
乳奴詣金降已酉金復以書來招答其書壬子金帥書來  
不許請和是月特母哥挈雅里至上怒不能盡救諸子詰  
之五月乙卯夏國王李乾順遣使請臨其國庚申軍將耶  
律敵烈等夜劫梁王雅里奔西北部立以爲帝改元神曆  
辛酉渡河止于金肅軍北回离保爲衆所殺六月遣使冊  
李乾順爲夏國皇帝秋九月耶律大石自金來歸冬十月  
復渡河東還居突呂不部梁王雅里歿耶律术烈繼之十  
一月术烈爲衆所殺

四年春正月上趨都統馬哥軍金人來攻棄營北遁馬哥

被執謨葛失來迎驢馬馳羊又率部人防衛時侍從之糧  
數日以衣易羊至烏古敵烈部以都點檢蕭乙薛知北院  
樞密使事封謨葛失爲神于越王特母哥降金二月耶律  
遜設等十人謀叛伏誅夏五月金人旣克燕驅燕之大家  
東徙以燕空城及涿易檀順景薊州與宋以塞盟左企弓  
康公弼曹勇義虞仲文皆東遷燕民流離道路不勝其苦  
入平州言於留守張穀曰宰相左企弓不謀守燕使吾民  
流離無所安集公今臨巨鎮握強兵盡忠於遼必能使我  
復歸鄉土人心亦惟公是望穀遂召諸將領議皆曰聞天  
祚兵勢復振出沒漠南公若仗義勤王奉迎天祚以圖中

興先責左企弓等叛降之罪而誅之盡歸燕民使復其業而以平州歸宋則宋無不接納平州遂爲藩鎮矣即後日金人加兵內用平山之軍外得宋爲之援又何懼焉穀曰此大事也不可草草翰林學士李石智而多謀可召與議石至其言與之合乃遣張謙率五百餘騎傳留守令召宰相左企弓曹勇義樞密使虞仲文參知政事康公弼至灤河西岸遣議事官趙祕校往數十罪曰天祚播遷夾山不即奉迎一也勸皇叔秦晉王僭號二也詆訐君父降封湘陰三也天祚遣知閣王有慶來議事而殺之四也檄書始至有迎秦拒湘之議五也不謀守燕而降六也不顧大義

臣事于金七也根括燕財取悅于金八也使燕人遷徙失業九也教金人發兵先下平州十也爾有十罪所不容誅左企弓等無以對皆縊殺之仍稱保大三年畫天柝象朝夕謂事必告而後行補遼官秩六月榜諭燕人復業恒彥爲常勝軍所占者悉還之燕民旣得歸大悅翰林學士李石更名安弼偕故三司使高黨往燕山說宋王安中曰平州帶甲萬餘穀有文武材可用爲屏翰不然將爲肘腋之患安中深然之令安弼與黨詣宋宋主詔帥臣王安中詹度厚加安撫與免三年常賦穀問之自謂得計秋七月金人屯來州闔戶開平州附宋以二千騎問罪先入營州穀



通鑑卷一百一十五

以精兵萬騎擊敗之

宋建平州為泰寧軍以穀為節度使

以安弼黨為徽猷閣待制令宣撫司出銀絹數萬犒賞穀

喜遠迎金人謀知舉兵來襲穀不得歸奔燕金人克三州

始來索穀主安中諱之索急斬一人貌類者去金人曰非

穀也以兵來取安中不得已殺穀函其首送金天祚既得

林牙耶律大石兵歸又得陰山室韋謨葛失兵自謂得天

助再謀出兵復收燕雲大石林牙力諫曰自金人初陷長

春遼陽則車駕不辛廣平淀而都中京及陷上京則都燕

山及陷中京則幸雲中自雲中而播遷夾山向以全師不

謀戰備使舉國漢地皆為金有國勢至此而方求戰非計

也當養兵待時而動不可輕舉不從大石遂殺乙薛及坡里括置北南面官屬自立爲王率所部西去上遂率諸軍出夾山下漁陽嶺取天德東勝寧邊雲內等州南下武州遇金人戰于奄遏下水復潰直趨山陰八月國舅詳穩蕭撻不也筆硯祗候察剌降金是月金主阿骨打死九月建州降金冬十月納突呂不部人訛哥之妻諳葛以訛哥爲本部節度使昭古牙率衆降金金攻興中府降之十一月從行者舉兵亂北護衛太保朮者舍利詳穩牙不里等擊敗之十二月置三總管府

本紀第二十九卷

本紀第三十

遼史三十

開府儀同三司柱國驍國軍事中書右丞相兼國史領經筵事都總裁臣脫脫奉

勅修

天祚皇帝四

五年春正月辛巳党項小斛祿遣人請臨其地戊子趨天德過沙漠金兵忽至上徒步出走近侍進珠帽却之乘張仁貴馬得脫至天德己丑遇雪無禦寒具术者以貂裘帽進途次絕糧术者進之興東欲憇术者即跪坐倚之假寐术者輩惟齧冰雪以濟饑過天德至夜將宿民家給曰偵騎其家知之乃叩馬首跪而大慟潛宿其家居數日嘉其

忠遙授以節度使遂趨党項以小斛祿爲西南面招討使  
總知軍事仍賜其子及諸校爵賞者差二月至應州新城  
東六十里爲金人完顏婁室等所獲八月癸卯至金丙午  
降封海濱王以疾終年五十有四在位二十四年金皇統  
元年二月改封豫王五年葬于廣寧府閭陽縣乾陵傍耶  
律淳者世號爲北遼淳小字涅里興宗第四孫南京留守  
宋魏王和魯幹之子清寧初太后鞠育之既長篤好文學  
昭懷太子得罪上欲以淳爲嗣上怒耶律白斯不知與淳  
善出淳爲彰聖等軍節度使天祚卽位進王鄭乾統二年  
加越王六年拜南府宰相議制兩府禮儀上喜徙王魏

其父和魯幹薨即以淳襲父守南京冬夏入朝寵冠諸王  
天慶五年東征都監章奴濟鴨子河與淳子阿撒等三百  
餘人亡歸先遣敵里等以廢立之謀報淳淳斬敵里首以  
獻進封秦晉國王拜都元帥賜金券免漢拜禮不名許自  
擇將士乃募燕雲精兵東至錦州隊長武朝彥作亂劫淳  
淳匿而免收朝彥誅之會金兵至聚兵戰于阿里軫斗敗  
績收亡卒數千人拒之淳入朝釋其罪詔南京刻石紀功  
保大二年天祚入夾山奚王回離保林牙耶律大石等引  
唐靈武故事議欲立淳淳不從官屬勸進曰主上蒙塵中  
原擾攘若不立王百姓何歸宜熟討之遂即位百官上號

天錫皇帝改保大二年爲建福元年大赦放進士李寶信等一十九人遙降天祚爲湘陰王以燕雲平上京中京遼西六路淳主之沙漠以北南北路兩都招討府諸蕃部族等仍隸天祚自此遼國分矣封其妻普賢女爲德妃以回離保知北院樞密使事軍旅之事悉委大石又遣使報宗免歲幣結好宋人發兵問罪擊敗之尋遣使奉表于金乞爲附庸事未決淳病死年六十百官僞謚曰孝章皇帝廟號宣宗葬燕西香山永安陵遺命遙立秦王定以存社稷德妃爲皇太后稱制改建福爲德興元年放進士李球等百八人時宋兵來攻戰敗之由是人心大悅兵勢日振宰

相李純等潛納宋兵居民內應抱關者被殺甚衆翌日攻  
內東門衛兵力戰宋軍大潰踰城而走死者相籍五表于  
金求立秦王不從而金兵大至德妃奔天德軍見天祚天  
祚怒誅德妃降淳庶人除其屬籍耶律雅里者天祚皇帝  
第二子也字撒鸞七歲欲立爲皇太子別置禁衛封梁王  
保大三年金師圍青塚寨雅里在軍中大保特母哥挾之  
出走間道行至陰山聞天祚失利趨雲內雅里馳赴時扈  
從者千餘人多於天祚天祚慮特母哥生變欲誅之責以  
不能全救諸王將訊之仗劍召雅里問曰特母哥教汝何  
爲雅里對曰無他言廼釋之天祚渡河奔夏隊帥耶律敵



列等劫雅里北走至沙嶺見蛇橫道而過識者以爲不祥  
後三日群僚共立雅里爲主雅里遂即位改元神曆命士  
庶上便宜雅里性寬大惡誅殺獲亡者答之而已有自歸  
者即官之因謂左右曰欲附來歸不附則去何須威逼耶  
每取唐貞觀政要及林牙資忠所作治國詩令侍從讀之  
烏古部節度使紇哲迭烈部統軍撻不也都監突里不等  
各率其衆來附自是諸部繼至而雅里日漸荒怠好擊鞠  
特母哥切諫乃不復出以耶律敵烈爲樞密使特母哥副  
之敵烈劾西北路招討使蕭紇里失惑衆心志有不臣與  
其子麻涅並誅之以遙設爲招討使與諸部戰數敗杖免

官從行有疲困者輒振給之直長保德諫曰今國家空虛  
賜賚若此將何以相給耶雅里怒曰昔畋於福山卿誣獵  
官今復有此言若無諸部我將何取不納初令群牧運鹽  
灤倉粟而民盜之議籍以償雅里乃自爲直每粟一車償  
一羊三車一牛五車一馬八車一駝左右曰今一羊易粟  
二斗且不可得乃償一車雅里曰民有則我有若令盡償  
民堪後獵查刺山一日而射黃羊四十狼二十一因致  
疾年三十耶律大石者世號爲西遼大石字重德太祖  
八代孫也通遼漢字善騎射登天慶五年進士第擢翰林  
應奉尋陞承旨遼以翰林爲林牙故稱大石林牙歷泰祥

二州刺史遼興軍節度使保大二年金兵日逼天祚播越  
與諸大臣立秦晉王淳爲帝淳死立其妻蕭德妃爲太后  
以守燕及金兵至蕭德妃歸天祚天祚怒誅德妃而責大  
石曰我在汝何敢立淳對曰陛下以全國之勢不能一拒  
敵棄國遠遁使黎民塗炭即立十淳皆太祖子孫豈不勝  
乞命於他人耶上無以答賜酒食赦其罪大石不自安遂  
殺蕭乙薛坡里括自立爲王率鐵騎二百宵遁北行三日  
過黑水見白達達詳穩牀古兒牀古兒獻馬四百駝二十  
羊若干西至可敦城駐北庭都護府會威武崇德會番新  
大林紫河駝等七州及大黃室韋敵刺王紀刺茶赤刺也

喜鼻古德尼刺達刺垂達密里密兒紀合主烏古里阻卜  
普速完唐古忽母思奚的紂而畢十八部王衆諭曰我祖  
宗艱難創業歷世九主歷年二百金以臣屬逼我國家殘  
我黎庶屠翦我州邑使我天祚皇帝蒙塵于外日夜痛心  
疾首我今仗義而西欲借力諸蕃翦我仇敵復我疆宇惟  
爾衆亦有軫我國家憂我社稷思共救君父濟生民於難  
者乎遂得精兵萬餘置官吏立排甲具器仗明年二月甲  
午以青牛白馬祭天地祖宗整旅而西先遺書回鶻王畢  
勒哥曰昔我太祖皇帝北征過卜古罕城即遣使至甘州  
詔爾祖烏母主曰汝思故國耶朕即爲汝復之汝不能返

耶朕則有之在朕猶在爾也爾祖即表謝以爲遷國于此  
十有餘世軍民皆安土重遷不能復返矣是與爾國非一  
日之好也今我將西至大食假道爾國其勿致疑畢勒哥  
得書即迎至邸大宴三日臨行獻馬六百駝百羊三千願  
質子孫爲附庸送至境外所過敵者勝之降者安之兵行  
萬里歸者數國獲駝馬牛羊財物不可勝計軍勢日盛銳  
氣日倍至尋思干西域諸國舉兵十萬號忽兒珊來拒戰  
兩軍相望二里許諭將士曰彼軍雖多而無謀攻之則首  
尾不救我師必勝遣六院司大王蕭幹里剌招討副使耶  
律松山等將兵二千五百攻其右樞密副使蕭剌阿不招

討使耶律木薛等將兵二千五百攻其左自以衆攻其中  
三軍俱進忽兒珊大敗僵屍數十里駐軍尋思干凡九十  
日回國王來降貢方物又西至起兒漫文武百官冊立  
大石爲帝以甲辰歲二月五日即位年三十八號葛兒罕  
復上漢尊號曰天祐皇帝改元延慶追謚祖父爲嗣元皇  
帝祖母爲宣義皇后冊元妃蕭氏爲昭德皇后因謂百官  
曰朕與卿等行三萬里跋涉沙漠夙夜難勤賴祖宗之福  
卿等之力冒登大位爾祖爾父宜加卹典共享尊榮自蕭  
幹里刺等四十九人祖父封爵有差延慶三年班師東歸  
馬行二十日得善地遂建都城號虎思幹耳朶改延慶爲

康國元年三月以六院司大王蕭幹里刺爲兵馬都元帥  
敵刺部前同知樞密院事蕭查刺何不副之茶赤刺部秃  
魯耶律燕山爲都部署護衛耶律鐵哥爲都監率七萬騎  
東征以青牛白馬祭天樹旗以誓于衆曰我大遼自太祖  
太宗艱難而成帝業其後嗣君耽樂無厭不恤國政盜賊  
蠭起天下土崩朕率爾衆遠至朔漠期復大業以光中興  
此非朕與爾世居之地申命元帥幹里刺曰今汝其往信  
賞必罰與士卒同甘苦擇善水草以立營量敵而進毋自  
取禍敗也行萬餘里無所得牛馬多死勒兵而還大石曰  
皇天弗順數也康國十年殁在位二十年廟號德宗子夷

列年幼遺命皇后權國后名塔不煙號感天皇后稱制改  
元咸清在位七年子夷列即位改元紹興籍民十八歲以  
上得八萬四千五百戶在位十三年殁廟號仁宗子幼遺  
詔以妹普速完權國稱制改元崇福號承天太后後與駙  
馬蕭朵魯不弟朴古只沙里通出駙馬爲東平王羅織殺  
之駙馬父幹里刺以兵圍其宮射殺普速完及朴古只沙  
里普速完在位十四年仁宗次子直魯古即位改元天禧  
在位三十四年時秋出獵乃蠻王屈出律以伏兵八千擒  
之而據其位遂襲遼衣冠尊直魯古爲太上皇皇后爲皇  
太后朝夕問起居以侍終焉直魯古死遼絕耶律淳在天



祚之世歷王大國受賜金券贊拜不名一時恩遇無與爲比當天祚播越以都元帥留守南京獨不可奮大義以激燕民及諸大臣興勤王之師東拒金而迎天祚乎乃自取之是慕也况忍王天祚哉大石旣帝淳而王天祚矣復歸天祚天祚責以大義乃自立爲王而去之幸籍祖宗餘威遺智建號萬里之外雖寡母弱子更繼迭承幾九十年亦可謂難矣然淳與雅里大石之立皆在天祚之世有君而復君之其可乎哉諸葛武侯爲獻帝發喪而後立先主爲帝者不可同年語矣故著以爲戒云

贊曰遼起朔野兵甲之盛鼓行殿外席卷河朔樹晉植漢

何其壯歟太祖太宗乘百戰之勢輯新造之邦英謀睿畧  
可謂遠矣雖以世宗中才穆宗殘暴連遘弑逆而神器不  
搖蓋由祖宗威令猶足以震疊其國人也聖宗以來內脩  
政治外拓疆宇旣而申固鄰好四境乂安維持二百餘年  
之基有自來矣降臻天祚旣丁未運又缺人望崇信姦回  
自掬國本群下離心金兵一集內難先作廢立之謀叛亡  
之迹相繼蠡起馴致土崩瓦解不可復支良可哀也耶律  
與蕭世爲甥舅義同休戚奉先挾私滅公首旣構難一至  
於斯天祚窮蹙始悟奉先誤已不幾晚乎淳雅里所謂名  
不正言不順事不成者也大石苟延彼善於此亦幾何哉

本紀第三十